



REPUBLIKA E KOSOVËS - REPUBLIKA KOSOVA - REPUBLIC OF KOSOVO
KËSHILLI GJYQËSOR I KOSOVËS - SUDSKI SAVET KOSOVA - KOSOVO JUDICIAL COUNCIL
PANELI ZGJEDHOR PËR ANKESA DHE PARASHTRESA
IZBORNI PANEL ZA ŽALBE I PREDSTAVKE - ELECTION COMPLAINTS AND APPEALS PANEL

ZP. Anr.26/2025

PANELI ZGJEDHOR PËR ANKESA DHE PARASHTRESA (PZAP), i përbërë nga gjyqtarët : Skender Çoçaj - kryesues, Arsim Hamzaj, dhe Kymete Kicaj - anëtarë, duke vendosur lidhur me ankesën e subjektit politik Lëvizja Vetëvendosje (LVV), me seli në Komuna Prishtinë, të parashtruar kundër subjektit politik Lista Serbe, me seli në Komuna Mitrovicë të Veriut, për shkak të shkeljes së Kodit të Mirësjelljes për Subjektet Politike, Mbështetësit e tyre dhe Kandidatët, gjatë fushatës për Zgjedhjet e Parakohshme për Kuvend të Republikës së Kosovës, që do të mbahen më 28 Dhjetor 2025, në seancën e panelit të mbajtur më 22.12.2025, merr këtë :

V E N D I M

I. PRANOHET E BAZUAR ankesa e subjektit politik Lëvizja Vetëvendosje, me seli në Prishtinë, ZP.Anr.26/2025 datë 19.12.2025.

II. Subjektit politik Lista Serbe, me seli në Mitrovicë të Veriut, për shkak të shkeljes së Kodit të Mirësjelljes për Subjektet Politike, Mbështetësit e tyre dhe Kandidatët, gjatë fushatës për Zgjedhjet e Parakohshme për Kuvend të Republikës së Kosovës, që do të mbahen më 28 Dhjetor 2025, i shqiptohet dënimi me gjobë në lartësi prej 2000(dymijë) Euro.

III. DETYROHET Subjekti politik Lista Serbe, me seli në Mitrovicë të Veriut, që gjobën e shqiptuar si në pikën -II- të dispozitivit të këtij vendimi, ta paguaj në afat prej 15 ditëve, nga dita e plotfuqishmërisë së këtij vendimi.

IV. URDHËROHET Subjekti politik Lista Serbe, me seli në Mitrovicë të Veriut, që nga momenti i marrjes së këtij vendimi të largojë banerin e vendosur në hapësirën e jashtme të objektit kolektiv të banimit, përkatësisht në sheshin "Car Llazar" në qytetin e Mitrovicës Veriore, përndryshe mosbindja ndaj kësaj urdhërese paraqet shkelje tjetër të këtij ligji që mund të sanksionohet me dënime shtesë nga PZAP-i.

A r s y e t i m

Me datë 19.12.2025 PZAP-i ka pranuar ankesën e parashtruar nga subjekti politik Lëvizja Vetëvendosje, në të cilën theksohet se më datë 18 dhjetor 2025, aktivistët e Qendrës së Lëvizjes Vetëvendosje, në Mitrovicë kanë identifikuar baner të vendosur në një objekt kolektiv banimi, përkatësisht në sheshin "Car Llazar" në qytetin e Mitrovicës Veriore, nga subjekti politik Lista Serbe. Sipas parashtruesit të ankesës ky veprim është në kundërshtim me nenin 7 paragrafi 2.6 të Rregullores Zgjedhore Nr. 07/2024 për Fushatën e Zgjedhjeve, e

cila ndalon vendosjen e materialeve zgjedhore në ndërtesa apo objekte banimi përveçse me pëlqimin paraprak të banorëve dhe kur janë të kontraktuara. Tutje në ankesë theksohet se vendosja e materialit propagandues në hapësira kolektive banesore, pa pëlqimin paraprak të banorëve dhe pa një kontraktim të rregullt, përbën shkelje të qartë të dispozitave të Ligjit për Zgjedhjet e Përgjithshme dhe të Rregullores Zgjedhore Nr. 07/2024 për fushatën zgjedhore, Një veprim i tillë dëmton parimin e barazisë ndërmjet subjekteve politike në garën zgjedhore dhe paraqet uzurpim të hapësirave të përbashkëta të banimit. Për më shumë, kjo bie në kundërshtim me parimin e barazisë së garës zgjedhore, me të drejtën për zgjedhje të lira dhe të ndershme, si dhe me standardet themelore të demokracisë, duke u dhënë disa subjekteve politike një avantazh të padrejtë përmes shfrytëzimit të hapësirave të palejuara. Parashtruesi i ankesës ka bashkëngjitur ankesës fotografat në cilësinë e provës.

Në përgjigje në ankesë subjekti politik Lista Serbe thekson se vendosja e posterit zgjedhor është kryer plotësisht në përputhje me Rregulloren ekzistuese Zgjedhore Nr.07/2024 për fushatën zgjedhore, pasi ekziston pëlqimi i banorëve të ndërtesës në të cilën është vendosur posteri në fjalë.

Në përputhje me nenin 7, paragrafin 2.6 të Rregullores Zgjedhore Nr.07/2024, është parashikuar si më poshtë: “Është e ndaluar vendosja e materialit zgjedhor në ndërtesa banimi ose objekte kolektive, përveç me pëlqimin paraprak të banorëve dhe kur ato janë të rregulluara me kontratë. “Duke pasur parasysh se në rastin konkret është marrë pëlqimi i banorëve të objektit në fjalë, nuk ka shkelje të rregullores së përmendur, as të Ligjit për zgjedhjet e përgjithshme. Prandaj, pohimet në ankesë janë të pabazuara dhe nuk mbështesin pretendimet për shkelje të rregullave zgjedhore. Dokumentin me nënshkrimet e banorëve e dorëzojmë si bashkëngjitje të përgjigjes ndaj ankesës.

Në përgjigje po ashtu theksohet se Lista Serbe respekton plotësisht parimet e ligjshmërisë, barazisë së pjesëmarrësve në fushatën zgjedhore dhe standardet demokratike, dhe të gjitha aktivitetet i kryen ekskluzivisht në përputhje me kornizën ekzistuese ligjore, dhe se kjo është një insinuacion i dukshëm dhe i qëllimshëm me të cilin është keqpërdorur e drejta për ankesë, pasi është e qartë se ajo nuk është parashtruar në përputhje me Rregulloren Zgjedhore Nr.7/2024. Gjithashtu theksojmë se ankesa është dorëzuar pa përdorimin e formularit standard, i cili është një kusht obligues, duke shkelur kështu procedurën e parashtrimit të ankesës.

Paneli Zgjedhor për Ankesa dhe Parashtresa-PZAP, pasi shqyrtimit të ankesës, dhe shkresave të lëndës, gjeti se:

Ankesa është e bazuar.

Paneli pas shikimit të shkresave të lëndës, dhe përgjigjes në ankesë të parashtruar nga subjekti politik Lista Serbe, vlerësoj se pretendimet e Subjektit Politik LVV, janë të qëndrueshme dhe të bazuara, dhe si të tilla i aprovoj, për faktin se veprimet e përshkruara në ankesë paraqesin shkelje nga ana e subjektit politik Lista Serbe, me numër 127 për procesin zgjedhor për Zgjedhjet e Parakohshme për Kuvendin e Republikës së Kosovës, që do të mbahet me datë 28 Dhjetor 2025, ngase e njëjta ka vendosur baner në një objekt kolektiv banimi, përkatësisht në sheshin "Car Llazar" në qytetin e Mitrovicës Veriore, ku me këto

veprime ka shkelur dispozitat e nenit 34 paragrafi 1 nën paragrafi 1.2 i Ligjit NR.08/L-228, për Zgjedhjet e Përgjithshme në Republikën e Kosovës, në të cilin nen ndër të tjera thuhet se *“Veprimet e ndaluara të Subjekteve Politike...Vendosja e njoftimeve, pllakateve dhe posterëve, ose përndryshe vendosja e emrave të tyre ose sloganeve në lidhje me fushatën zgjedhore brenda ose jashtë ndërtesave publike ose godinave në apo mbi rrugët publike, në shenjat publike të trafikut brenda ose jashtë hapësirave ose ndërtesave të zëna ose ndryshe që shfrytëzohen nga organizatat ndërkombëtare ose brenda ose në hapësirat private pa lejen e pronareve ose shfrytëzuesve”, po ashtu edhe sipas nenit 7 paragrafi 2 nën paragrafi 2.6 i Rregullores Zgjedhore Nr. 07/2024 për Fushatën e Zgjedhjeve, Monitorimin e Fushatës së Zgjedhjeve dhe Deklarimin Financiar përcakton se “Materiali i subjekteve politike nuk duhet të vendoset, në “ndërtesa apo objekte të banimit, përveç me pëlqimin e banorëve, si dhe kur janë të kontraktuara”,*

Paneli i rikujton se sipas dispozitës së Rregullores Zgjedhore Nr. 07/2024 neni 7 paragrafi 3 përcakton se: *“Materialet e shtypura të zgjedhjeve, mund të ekspozohen vetëm brenda dhe jashtë objekteve në pronësi private, ndërtesave, strukturave, ose objekteve të tjera, përveç atyre të saktësuara në paragrafin 2 të këtij neni, pas miratimit paraprak të pronarëve të tyre”.*

Subjekti Politik, Lista Serbe në përgjigje në ankesë ka kundërshtuar ankesën e parashtruesit të ankesës duke theksuar se posteri është vendosur me pëlqim të banorëve të objektit banesor.

Për Panelin këto pretendime janë të pa bazuar, për faktin se baneri është vendosur në hapësirën e jashtme të objektit të banimit kolektiv, dhe se për këtë rast duhet leje e veçantë, përkatësisht, pëlqim nga Drejtoria përkatëse të lëshuar nga Komuna e Mitrovicës së Veriut. Kurse në rastet kur objektet janë private, atëherë duhet të sigurohet pëlqimi me shkrim nga pronari-shfrytëzuesi i objektit.

Paneli po ashtu vlerësoi edhe pretendimet tjera nga përgjigja në ankesë, mirëpo të njëjtat i vlerësoi si të pa bazuara, për faktin se të njëjtat nuk janë provuar me asnjë provë të vetme.

Prandaj, duke u mbështetur në nenin 117.3 të Ligjit NR.08/L-228, për Zgjedhjet e Përgjithshme në Republikën e Kosovës në të cilin nen në mënyrë thuhet se *“vendosja për ankesat nga PZAP-ja mbështetet në dëshmi të qarta dhe bindëse”,* Paneli vlerësoj se pretendimet e tilla të palës ankuese janë të qëndrueshme dhe si të tilla i pranoi, sepse kjo shkelje ka të bëjë me faktin se Kodi i Mirësjelljes i detyron të gjitha subjektet politike, kandidatët, anëtarët e subjekteve dhe mbështetësit e tyre që ta respektojnë këtë kod me qëllim të krijimit të kushteve që gjatë periudhës së fushatës, veprimet e subjekteve politik të jenë në një atmosferë të tolerancës demokracisë, paqes dhe respektit për sundimin e ligjit se nga veprimet e përshkruara në ankesë nga parashtruesi i ankesës paraqesin shkelje të dispozitave të lartcekura, dhe të njëjtën e pranoi si të bazuar.

Paneli, me rastin e vendosjes së gjobës si në dispozitiv të këtij vendimi, ka marrë parasysh të gjitha rrethanat si në vijim : natyrën e shkeljes, dhe ndikimit të mundshëm të saj në procesin zgjedhor në fjalë, shkallën dhe peshën e shkeljes, se ky veprim i tyre përbën shkelje të legjislacionit zgjedhor. Po ashtu, Subjekti Politik, Lista Serbe, ka qenë i njoftuar me obligimet dhe përgjegjësit gjatë procesit të fushatës zgjedhore, prandaj vendosja e posterëve

të subjektit të tyre politik për fushatë zgjedhore në objekte publike gjegjësisht në objekte banesore kolektive në Mitrovicën e Veriut, përbën shkelje të legjislacionit zgjedhor, dhe të njëjta shkelje janë sanksionuar me nenin 34 par.1 nën par.1.2 të Ligjit NR.08/L-228, për Zgjedhjet e Përgjithshme në Republikën e Kosovës.

Paneli vlerëson se në rastin konkret Lista Serbe, urdhërohet që nga momenti i marrjes së këtij vendimi të largojë banerin e vendosur në objekt banesor kolektiv, përkatësisht në sheshin "Car Llazar" në qytetin e Mitrovicës Veriore, ndërsa dështimi për t'iu bindur kësaj urdhëresë të PZAP-it, brenda periudhës së përmendur në vendim, paraqet shkelje tjetër të këtij ligji që mund të sanksionohet me dënime shtesë nga PZAP-i.

Nga arsyet e theksuar më lartë duke bazuar nenin 117 paragrafi 3, neni 118 paragrafi 1, dhe neni 120 paragrafi 1 nën paragrafi 1.3, dhe paragrafi 2, të Ligjit NR.08/L-228, për Zgjedhjet e Përgjithshme në Republikën e Kosovës, paneli vendosi si në dispozitiv të këtij vendimi.

PANELI ZGJEDHOR PËR ANKESA DHE PARASHTRESA

ZP.Anr.26/2025 më datën 22.12.2025



KËSHILLA JURIDIKE: *Kundër këtij vendimi nuk lejohet ankesa konform nenit 118 par. 4 të Ligji Nr.08/L-228 për Zgjedhjet e Përgjithshme në Republikën e Kosovës.*